

GUITS NE PXEEL PABL LO

ZHA GALÁS

1 ¡Diuzh to grëse to!

Naa nac Pabl, tib zha ne pxeel Dios nonee Xtiidz Ndzon me lo miech. Led miechd bzoo naa, led miechd pxeel naa, sinque Jesús pxeel naa, me ni Dios Pxo_z me, men ne bleeban me.

²Laa naa rxel tib guits rii ziaad lo to zigne no to nëz Galás i, nac to zha ne ngab lo Jesús; rquiaabdiuzh naa to, ni scagaa grë zha rii laa zho rxeeł bdiuzh lo to.

³Dios men ne nac Pxo_z ne, ni Jesús men ndzon ne rnabey, me nac men ne tsoxco grë zhizhgab to, zeena peet tsienied guic to. ⁴Jesús bdeed xquielmban bdiuzh me xtoł ne, psilaa me no lo grëtaa guielntseeb ne no lo guidzliu rii, laaw been me zigne gocladzse Dios men ne nac Pxo_z me. ⁵¡Gotsaa dziuunnon ne Dios sca, ni gdziñd dze ne csaan ne dziuunnon ne me! Sca rieguiala.

⁶Rzee zdoo naa gon ne gardle gac nroob dze ga, laa to bzozitle lo Xtiidz Ndzon Dios, men ne bredz to pcaania me to, porne nquialadz Jesús to. Wseed ne riladz to niina, masaque rzac to na mincogaa csilaa to lo dol. ⁷Per guiendraa stib wseed ne gon csilaa ne lo dol. Mine naca zha ne biadseed to i, lega rquidiese zho to, racladz zho ctsëe zho mine nac Xtiidz Ndzon Jesús.

⁸Grëse zha ne guiaadnie stiblo wseed mine pseete no to, ni gnë zho lëe min co csilaa to lo dol; zha ne sca gun, miech ndziibdeele ga nac zho. Tel chotaa sca gun, niicle tel naazhala, tib anjl ne quietgaa gbaaw, ible zdzibdee Dios zho. ⁹Bnele naaw lo to, ni na laaw rneque naa stib: Tel cho zha ne guidseed to stiblo wseed mine pseete no to, ni gnë zho lëe min co csilaa to lo dol, ible zdzibdee Dios zho.

¹⁰Nana gon ne znu rne naa, no to guiab parne guiannziuu naa lo miech gane znu rne naa; per golgacnan ganle, quiaguibd naa guiannziuu naa lo miech, sinque laa naa noxco gun naa mine rnabey Dios. ¡Sac telne leł ncuane gleynie miech noxco naa, nlid dzigo xtsiin Jesús ga noyun naa!

Jesús pxeel Pabl gnee Pabl Xtiidz me

¹¹Bets, bzian, golgacnan sca ganle: Wseed ne nac Xtiidz Ndzon Jesús, mine bialseed naa to, led guicd miech biaba. ¹²Paat biad naa nseed miech naaw, sinque Jesúszhal bneedza lo naa.

¹³Led ganle to ganle, zha nactaa grè miñe beñ naa zeene bii no naa lo zhiwseed zha Israel; ptsidiñ naa grè miech ne no xnèz Jesús, blëënie naa zho, pquianañ naa nloozh naa zho. ¹⁴Bzhoob diidz ne naa nac zha ne pseedraa lo grè menladz naa, zha ne tipse biagrëë naa scuel; naa nac zha ne neer lo zho, sac naa run grëse miñe rnabey zhiwseed zha Israel, ni naa rioxcoraa run grëse miñe beñ grè pxozgol no. Sca nagon goc naa lo zha Israel.

¹⁵Ible güeynied guic naa, antes ne gal naa laa Dios bzooblolé naa gunbey naa Xpëéd me; laa me bleextsole naa, niapse porne nquialadz me naa. Zeene bdziñ dze co ¹⁶laa me blu me lo naa, bzo me naa ga naa zaatne ndxie grè miech ne nacdraa zha Israel, gaseed naa zho Xtiidz me miñe glu zha laa zho lo dol. Zeene blozh gon naa Xpëéd me, biad naa niaguib naa ne goon dien cho nseed naa, ¹⁷ni niicle biadгаа naa Jerusalén, nianabdiidz naa lo grè zha ne pxeelle me nonee Xtiidz me; sinque laa naa bia nëz Arab, wbirele naa nëz co, dzigoraа bdziñ naa Damasc stib.

¹⁸Gocle tson iza dzigoraа bia naa Jerusalén, hor coraa beenbey naa Pedr; blëz naa lo me ga tsiñ ngbidz. ¹⁹Gaque beenbey naa Jacob bets Jesús, laa grëraа zha ne pxeel Jesús noyñ xtsiñ me, ni tib zho gon naa. ²⁰Dios zobwi ganle diidzli nac grè miñe rne naa nu, led lega rned naaw.

²¹Zeene brie naa ga, laa naa bia nëz Siria ni nëz Cilis. ²²Grè zha Judé zha ne nole xnèz Jesús, gard gunbey zho naa len dze co. ²³Diidz ronse zho rnee zla zha ne nacgrè zho: “Men ne scataa pquianañ ne, yelee me noseed miech Xtiidz Dios, ni glo scataa gocladz me nitlo mew.” ²⁴Dzigo rley zho, rdeed zho xquizh lo Dios ne yelee naa rliladz Jesús.

Rcaania zho Pabl

2 Zeene blozh tsiida iza, dzigo laa naa biire bia Jerusalén stib, bio no grop no Bernabé, ni bionie no Tit. ²Laa naa bia, sac ib Dios blu lo naa ne no ga naa. Dzigo ga pcaalsa no grè no zha ne zo rnabey lo grè zha ne no xnèz Jesús ga, bzodiidz naa lo zho zha noseed naa grè zha ne nacd zha Israel Diidz Ndzon ne rlu lo zho zha laa zho lo dol, ni naa zeena guien zho ganle ne nli rquiin dziin ne benle naa, ni miñe quiaungaa naa. ³Ni nligaa bley zho bin zhow.

Niicle ne led zha Israeld nac Tit, per bnabeyd zho niopaa Tit bey ne rio grè zha Israel. ⁴Per lo zha ne ziobgza no ga, lad co brieequia bla zha ne bnab nio Tit bey co, per choot pquiaadiagd xtiidz zho. Nac diidz ye zho rliladz Jesús, per nlida; ib blud zho cho nac zho, ngeuets bzëëb zho lad no biadleets zho dien zha mban no, niina ne Jesúsle rnabey no, rnabeydraa ley no. Gocladz zho nquiaadiag no xtiidz zho, biire ndziun no miñe rnabey ley. ⁵Per ni palal bdeete no diidz niac miñe rnee zho, laa no racladz guiaannie to Xtiidz Ndzon Jesús miñe rlu zha laa miech lo dol, sac min co nac diidzli.

⁶Grè zha non ne zo rnabey lo grè zha ne no xnèz Jesús ga (zha non guiab ne, per ndion ne ganle grëse ne tibaque nac ne nëz lo Dios), ⁷⁻⁸ib peet blisquid zho lo naa, niicle peet pseetragaa zho naa. Sinque laa zho gocnañ ganle ne ib Dios bzoо naa gun naa xtsiñ me, gaseed naa grè zha ne nacd zha Israel

guien zho zha laa zho lo dol; zigne bzoque me Pedr noseed Pedr zha Israel. Dios men ne bzo Pedr quiaseed Pedr zha Israel, lëëque me bzo naa quiaseed naa grë zha ne nacd zha Israel.

⁹Gacxe waa, zig nac Pedr, Jacob, Juan, zha ne zo rnabey lo grë zha ne rliladz Jesús ga, laa zho bien ne ible naa bgaa guieInzaac rii, bneedz Dios dziin rii lo naa. Dzigo rley zho haxta bzhen zho nia no grop no Bernabé, laa no biaan diidz ne zha tsieseed zha Israel, laa no guioseed grë zha ne nacd zha Israel. ¹⁰Lëëse mine pso zho diidz lo no, dzioxco no dziuun no xyudar grë zha ne guieud pe yquiin; ni nligaa ib nongueI min co ni laaw noyoxco naa.

Ractox Pabl lo Pedr

¹¹Laa zeene biaad Pedr Antioquí, dzigo ga nli laa naa goctox lo Pedr, sac nucuaane ndzinlidraa quiayun Pedr. ¹²Glo, grëse zha ne nacd zha Israel zha ne rliladzle Jesús, rzënie Pedr zho, tipse rbenie Pedr zho zeene laa zho row; ni blozh ga, zeene laa bla zha ne pxeel Jacob bdzin ga, pasëraa Pedr sca tipse niownie zho, laa Pedr bzozit lo zho.

Rdzieb Pedr zha ne bdzin ga, sac lëë zha co racladz, grëse zha zit ne rzëëb xnëz Jesús ib none tso zho bey ne rio zha Israel. ¹³Grë zha Israel ne nole xnëz Jesús ga, yeque zho laa zho gocnie Pedr lo xtseb Pedr ga, haxta ye Bernabé wbig lo zho. ¹⁴Nacne zeene gon naa sca zienaldraa zho zigne nacpaa wseed ne ziaadnie Xtiidz Dios, squi ndxie grëse zha ne rcaalsa ga goctox naa lo Pedr, rep naa: “Luugase name niicle ne zha Israel luu, ni mband luu zigne nac zhiwseed zha Israel, ¿pe nac dzigo ne racladz luu gnabey luu grë zha ne nacd zha Israel, gban zho zigne nac zhiwseed zha Israel?”

Zha rlaa miech lo dol

¹⁵Golquiaadiaga ganle, tel no desde gol no zha Israel nac no, nacd no zigne nac grëraa miech ngoopdol ne nac stib nacion; ible pseed no grë mine nac xley zha Israel. ¹⁶Sangué niina laa no ndion ganle, niicle mazdraa gun miech mine nac ley grielod guiaanwen zho lo Dios, sinque zha ne dib zdoos gliladz Jesús, zha co nac zha ne guiaanwen lo me. Gacxe waa, ye no laa no bliladz Jesús dib zdoos no, zeena guiaanwen no lo Dios; ni laa no guiaanwen lo me porne dib zdoos no rliladz no Jesús, nacda porne dziuun no mine nac ley. Sac gon niicle zha ne tsoxcoraa gun zho grë mine nac ley, grielod guiaanwen zho lo Dios.

¹⁷Nana ne laa no wbig lo Jesús parne guiaanwen no lo Dios, no zha ne rzac dol ga. Masaque rzac zho xtol no ga rdziuunctal no porne rliladz no Jesús, per, ¡led scada gon! ¹⁸Mazd dol ga gun naa, telne rlozhle rseed naa miech rne naa lo zho ne led leyd nac mine csilaa ne lo dol, ni lozh ga naaque no lozhd tsoxco gun grë mine nac ley.

¹⁹Tel naa, ib brielod niun naa grë mine rnabey ley, ni zha ne rguiits ley gon ib none guet zho; gane niina masaque rreequia laa naa gutle.

Niina ne laa Jesús gut por grë xtol naa, rreequia ye naa gutnie me ga, zeena grielo gun naa mine rnabey Dios. ²⁰Led naadraa nu znu mban, Jesúsle nu

mbannie naa, ni guielmban ne mban naa niina, lëe min rii bneedz Dios lo naa porne riladz naa Xpëed me, men ne rquia zdo naa, men ne bleeladz xquielmban ga beet zho me bdiizh me xtoł naa.

²¹Tełne niaca mine nli zrieelo guiaanwen ne lo Dios porne gun ne mine nac ley, zhlëse ga dzigo biaadguet Jesús. Golgacnan sca ganle, Jesússe nac men ne csanwen ne lo Dios, gacxe waa nonguielda ga csan ne me tblad, ni pa lotaa ga pquia zdo Dios ne.

Jesús none gliladz miech

3 iNadzpaa nxen to nac to zha Galás! iPe goc to, cho biaadgunğüet guic to squi rac to? Pe led zeene biadseed no to, wen wen gocnan to cho nac Jesús, ni zha nacne sca beet miech me lo cruz.

²Zhal to golcobey dien, ipe ne been to grë mine nac xley zha Israel, laa to bgaa guielbiini chen Espiritu Sant, te ne bliladz to Xtiidz Diosa ye? ³Pa lotaa gon rdzin lo xquielnxen to i, conque laa to gonle ganle ne niapse por guielbiini chen Espiritu Sant laa to psilo mban tib guielmban cub, ni na nanaque to tsienal to ley. ⁴Pe nlpaa rnee to, ipe lega scase nazho gon to grë guielnë ne pteed miech to, zeene psilo bliladz to Xtiidz Jesús? ⁵iGolzhixcuaa guic to! Golguien ganle, laa Dios bneedz zhiEspiritu me lo to, ni laa me noyun grë milagr lo to, per nacda porne run to mine rnabey ley, sinque porne dib zdo to riladz to Xtiidz mew, mine biadseed no to.

⁶Zig Abraham, porne dib zdo me bliladz me xtiidz Dios mine rëb Dios lo me, gane pcaania Dios me zig tib zha ne peet xtold. ⁷Golgacnan sca ganle, grëse miech ne dib zdo gliladz Xtiidz Dios, grëse zha co laa Dios ycaania zho zig xpëedpaa Abraham.

⁸Mine nodzian ne niina, ib lo Xtiidzle Dios zhobneew, zeene bnee me ne grëse miech ne nacd zha Israel, silaa me zho telne dib zdo zho gliladz zho me. Lëe min co ga bnee me zeene znu rëb me lo Abraham: “Grëse miech ne ndxie dibdoo lo guidzliu, zha ne dib zdo gliladz naa zigne riladz luu naa, zunlay naa zho.” ⁹Gane grëse zha ne dib zdo riladz Jesús, runlay me zho zigne beenlayaque me Abraham, zeene laa Abraham bliladz me dib zdo Abraham.

¹⁰Sangue zha ne rnalo ley ne lëew csilaa zho, laa zho noyac ndziibdeele ga, sac lo Xtiidz Dios no tib zaatne rnee: “Ndziibdee grë zha ne grieelod gun grëse zigne nac ley.” iNi tsod zha ne gon grielo gun grëse mine rnabey ley! ¹¹Gase naganle rlu tsod tib zha ne grielo guiaanwen lo Dios por gun zho mine nac ley; ni laaw zhobneeque lo Xtiidz Dios zaatne rnee: “Zha ne guiaanwen lo Dios, laa zho guiaanwen porne dib zdo zho gliladz zho me; ni zha co ygaa tib guielmban ndzon.” ¹²Led yed ley rnab dien cho dib zdo gliladz; sinque rnee: “Zha ne racladz gban, none gun zho grëse mine rnabey ley.”

¹³Min co nagon, grëse ne nac ne miech laa ne biabdee, sac brielod mban ne zigne nac ley. Per niina, laa Jesús biaadsilaa ne lo grëtaa dee co, masaque lëe grë dee ne nac ne ga bi me zeene sca pquia me lo cruz; zigne zhobneeque lo Xtiidz Dios, zaatne rnee: “Miech ndziibdee ga nac grëse zha ne ret rquianga

zho tib lo yag.” ¹⁴Ni por miñe sca bded Jesús ga, miñ co niina grëse miech ne nacd zha Israel, zac ygaa zho grëse guiẽlnzaac ne bzeet Dios lo Abraham ga; ni niicle tib tibgaa zha ne ngab lo mew, scaania zho Espíritu Sant, Espíritu ne rëb me cxeel me lo grë zha ne dib zdoo gliladz me.

Zha ne nliipaa nac xpëed Abraham

¹⁵Bets, bzian, laa naa gzet ncuaane rac lo guidzliu rii. Nanle to ganle, zeene laa chop miech run tib trat, rquia miñe rnee zho ga lo guits ni rquia lë zho lo guits co grop zho; zeene laa lë zho pquiase ga, ni tib zho gacdraa ctsëe trat co. ¹⁶Nana gotsaa gwi ne ganle zha been Dios: Psañ me xtiidz me lo Abraham, ni tib lo men ne grieequia lo xtii Abraham. Raquiete nzian zho, rëbd me: “grë zha xtii Abraham”, sinque tibaque men ne bzeet me, ni lëe men co ga nac Jesús.

¹⁷Znu nagon nac miñe quiane naa lo to nu: Tib trat ga been Dios grop me Abraham, zeene rëb me scaania me grëse zha ne dib zdoo gliladz me; ni ible laa xtiidz co me biaan zig tib trat ne quia lë me lo. Min co nagon, grielod ctsëe ley trat co; zig nac ley, blozhle tap gayoo galptsii iz biaan xtiidz co me zeene laa ley bиаad. ¹⁸Sac gon, telne por gun ne miñe rnabey ley, laa ne ygaa grë guiẽlnzaac ne bzeet Dios lo zhitrat me gdeed me por tib men ne grieequia lo xtii Abraham; ¿pazhe dzigo rquiin trat co? Sac lo trat co raquiet ne por tib men ne grieequia lo xtii Abraham, laa me gneedz guiẽlnzaac co lo ne.

¹⁹Nana gnë to: “¿Pa dzigo rquiin ley ne laa ley biaan, ni tel nole trat co glo?” Laaw biaan gon zeena glu ganle zha nac miech, ib rond zho miñe rnabey Dios zho, laaw been dziin laga bdziñ dze ne laa men ne briequia lo xtii Abraham ga bиаad, men ne bzeet Dios ga zeene psañ me xtiidz me lo Abraham. Ni tel ley, dze ne pcaania zha Israela tib xanjl Dios pxeel me bdeeda lo Moisés, dzigo Moisésle psana lo menguedz Israel. ²⁰Sangue dze ne been Dios trat co grop me Abraham ne laa me csilaa miech lo dol, pxeeld me cho tib miech, cho tib anjlgaa niaadnie xtiidz me; sinque mezhai biadneew lo Abraham.

¿Pa rquiin ley?

²¹⁻²²Nana gnë to: “¿Zig gocladz dzigo lëe nsiooglo xley Moisés lo trat ne been Dios ga?” ¡Led scada! Sac grielod ygaa ne guiẽlmban ndzon ne gdziñd dze lozh ga, telne gnalo ne ley; ib grielod ley csanwena ne nëz lo Dios. Telne niaca miñe nrieelo ley nsilaaw miech lo dol, nod pe nacne dzigo nxeel Dios Xpëed me, bиаad me biadbee me miech lадznia dol (sac rnee lo Xtiidz Dios masaque ngadoo miech lo dol). Jesússe gon zrieelo csilaa miech lo dol, totsaque dib zdoo zho gnalo zho me, mese zrieelo gdeed guiẽlmban ndzon co lo zho.

²³Zeene gard guiaad Jesús ga, laa ley co pquiin pquianapa ne zigne rquianap wxtis zha ne nioogyu, laga bdziñ dze ne laa me bиаad. ²⁴Zig tib ngudziaan ne riaannie mëedwin, sca pquiin ley co lo ne, pseeda ne zha gban ne, ni gacnan ne cho nac Jesús, men ne csilaa ne lo dol zeene dib zdoo ne gliladz ne me. ²⁵Sangue niina ne laa Jesús bиаadle, led ley codraa gnabey ne, ni niicle rquiindragaa pe cseeda ne.

²⁶Gacxe waa, tel to xpëedle Dios nac to porne dib zdoe to riladz to Jesús, ²⁷ni grëse zha ne brobnisle porne no zho xnëz Jesús, laa zho rlu ganle ne Jesúsle nacie zho, ni laa zho zienaḷ gban zho zig racladz me. ²⁸Grëse ne tibaque nac ne niina, guiendraa ne goon cho nac zha Israel, cho nacгаа zha zit; dien cho nac ngundziin, cho nacгаа zha ne rnabey; goon dien cho nonraa pe nguiv te wnaaw ye; sac grëse zha ne naciele Jesús, tibaque nac zho grë zho. ²⁹Ga nagon, telne ngable to lo Jesús, dzigosi nli zha xtii Abraham nac to, ni zгаа to grë guielnzaac ne bzeet Dios zeene psan me xtiidz me lo Abraham.

Zha ne nac xpëed Dios

4 Golgona ganle, nligaa tib mëedwin lëë, niicle guiaanne win ncuaane rap pxoz win, per lega nacse win zig tib ngundziin win ne run xtsiin pxoz win. Niicle chen win grë ncuaan co, per grielod win gnabey wina. ²Laa win riaan ladznia zha ne ran win, zha ne rseed win dien pe nac ncuaane gun win, laga gdziḷ dze ne laa win zacle ycaania ncuaane psan pxoz win.

³Scadaa nagon bzhiaac ne glo zeene gard guida Jesús, rriequia masaque ngadoo ne lo grë ley co, ni lo grëraa ncuaane rac lo guidzliu rii. ⁴Laa zeene bdziḷ dze ne laa Dios pxeel Xpëed me Jesús lo guidzliu (tib wnaa bded por xnial me, bzoob me diidz been me grëse zigne rnabey xley zha Israel), ⁵laa me biaadsilaa ne, biadbee me ne ladznia ley co, bdiizh me grë xtol ne, zeena ycaania Dios ne gac ne mëed lo Dios. ⁶Ni parne glu ganle ne nli xpëedle Dios nac ne, pxeel Dios zhiEspíritu Xpëed me blëz zdoe ne; gacxe waa niina laa ne rien rnee ne lo me: “¡Papá yeen!” Espiritu co rnee ne Pxoze ne nac me.

⁷Ga nagon, led yedraa niina nac ne zig cholze cho ngundziin, sinque xpëedle Dios nac ne, ible ye ne yгаа grë guielnzaac ne rap Dios.

Rnee Pabl rnabeydraa ley

⁸Bets, bzian, golsoladz ganle, zeene bii gard gunbey to men ne nacpaa Dios, masaque rriequia ngadoo to lo ncuaane nac zhimdio to hor co, rdib rdzag to run to grë mine rzac to rdziladz grë mdio co. ⁹Nana, laa to runbeyle Dios, mazd gni naa ganle ledaa Dios runbeyle to, ¿pe nac dzigo racladz to gbiire tsiegan to, tsiequitsgzhib to lo grë mdio co, gbiire guiab to ladznia grë ncuaane paat rquiind co, gnabeya to? ¹⁰Rquia to gon run to grë lni, dien pa mëe ndzonraa, dien pa dze nac dze ndaraa, pa iz nac iz ne ndaraa, dien pa dze zac pe gow to, pa dzeegaa gacda. ¹¹¡Rdziebnie naa to gon! ¡Pe nliipaa zhlëse bialseed naa to, ne squi laa to racladz csaan mine bialne naa lo to!

¹²Bets, bzian, laa naa rnab lo to golban zigne mban naa, tel naa niicle ne zha Israel nac naa per zanaḷdraa naa mine nac xley zha Israel. Ngadoodraa naa lo ley, gane rne naa: Golban zigne mban naa. Ni guiabde to togo bod nend no pe falt ne been to lo naa.

¹³Led rsoladz to ganle, rzacnë naa len dze ne psilo pseed naa to zha laa to lo dol; min co nacne nzianlaa dze blëz naa lo to i. ¹⁴Niicle ne sca rzacnë naa, gondze to naa; laa ne mbix zdoe to nian to xquielguidz naa, znu quia zdoe

to naa, rley to blézlo to naa pale cho xanjl Dios o Jesús^{gaa}, tel niaca mine mezhah niaadseed to. ¹⁵¡Ne nlipagaa rleydox to len dze co! Tel niaca mine niac mbee to bziaalo to, zootle zig mbee tow ngad tow lo naa. ¿Yo grë guielbley co na? ¿Yo ne scataa rleynie to naa len dze co? ¹⁶Nana, pe rëb to rlëë naa lo to ne znu rne naa mine nacpaa diidzli. ¡Lëda gon!

¹⁷Golquiaadiaga ganle, grë zha ne gon squi ziadseed to i niina, nli laa zho noxco to per zhaa ncuaa^{ne} no guic zho. Laa zho racladz tebaa zha guiaanladz to naa, csaan to grë mine bialseed naa to, zeena gbig to lo zho.

¹⁸Rtsidild naa pe nacne cho gacnie to, totsaque zha ne nli nquialadz tow. Zig nac naa tibaque noxco naa to, led loxaque zeene zodse naa lo to i.

¹⁹¡Xin, ne nlipagaa gon rdednë naa ran naa squi rac to! Masaque nac guielnë rii lo naa niina, zig tib yoob ne rquia grë men wnaa ne gap mëed. Ni lëë nole naa guielnë rii nu nagon, haxta gdziⁿ dze ne gan naa laa to wbiire wbig lo Jesús tib. ²⁰Tebaa niaca mine grieelo guialzhaal naa lo to i niina, zeena gan naa zha no to, dzigo dien zha gnegaa naa lo to; per na ne znu zit zo naa, nan^d naa dien pe nacraa ncuaa^{ne} noyun to.

²¹Zha ne racladz gnabey xley zha Israel zho, racladz naa gnë zho dien, ¿pe ib riend zho zha zhobnee lo guits ne ziaad Xtiidz Dios ²²zaatne raquiet xingan Abraham? Rnew: Chop xingan Abraham, tib mëed co gop wnaa ne nac ngundziin lidz me, laa tib mëed gop wnaa ne nacpaa tsiel me. ²³Xpëed wnaa ne nac ngundziin ga, laa win goc mëed zig grëraa xpëed miech; sangue mëed ne gop tsiel me ga, laa win gol porne ib Dios rëb ne laa me yquianie win.

²⁴Lo grop wnaa co, tibga me rlu ganle zha nac grop trat ne been Dios: Mine bzhaac Agar, ga rlu ganle zha nac trat ne been Dios guic gui Sinaí. Grëse zha ne zienal trat co, nac zho zig goc xpëed Agar, ladznia trat co no zho. ²⁵Gzoob ne Agar nac Gui Sinaí, gui ne riaan nëz Arab; me nac guiedz Jerusalén ne ndxie len dze rii, sac tel grë menguiedz Jerusalén, masaque ngundziin nac zho lo ley. ²⁶Sangue wnaa ne gocpaa tsiel Abraham ga, rriequia me nac Jerusalén ne no gbaa, zaatne ngab grë zha ne no xnëz Jesús, sac led yedraa grë zha co ngadoo lo ley; ye ne ngab ga, ni gzoob ne lëë xn^{iaa} ne ga nac wnaa co. ²⁷Lëë Jerusalén co ga raquiet lo Xtiidz Dios, zaatne znu rnee:

Luu, ne nac luu wnaa ne brielod niap mëed, bley niina;
 nguieel goc, nguiedz broptsie lo guielbley qui,
 luu ne b^{dzi}nd dze niacnaⁿ luu zha nac yoob mëed.
 Sac gon ndalraa xpëed wnaa ne brielod niap mëed,
 lëdle grë xpëed wnaa ne gop mëed.

²⁸Bets, bzian, golgacnaⁿ sca ganle, laa ne nacle niina zig Isaac, xpëed tsielpaa Abraham, wnaa ne gac^d yquianie mëed ga; sac tel Isaac, ib Dios psan diidz ne laa Isaac gac mëed lo Abraham. ²⁹Ni zigne sca blëenie xpëed wnaa ngundziin co Isaac, mëed ne Dioszhal psan diidz gal ga; scasaque niina, no zha ne rlëë ran zho zionald ne mine rnabey ley, sinque laa ne zional dib zdoe ne riladz ne Jesús.

³⁰Lo Xtiidzaque Dios zhobnee ganle zha rëb Dios lo Abraham, rëb me: “Wnaa ne nac ngundziin lo luu i, bzonëz me grop xpëed me, nonguiëld ne ye mëed qui guiaannie ncuaañe csañ luu lo xpëed tsiel luu.” ³¹Gacxe nagon waa, tel ne nacd ne zig xpëed wnaa ngundziin co, sinque laa ne nac zig xpëed tsielpaa Abraham.

Dziits golso

5 Peet lo ngadoodraa ne niina, sac gon laa Jesús baaadsilaale ne, sinque to none dziits so zeena ygadoode to lo xley zha Israel. ²Naa nac Pabl, ni naazhal rne lo to nu. Golgona sca ganle, telne laa to gdeed diidz tso to xbey zha Israel, nacniedraa to Jesús ga dzigo. ³Ni laaw gneque naa lo to nu stib, grëse zha bgui ne rio bey co, ib none gun zho grëse zigne rnabey ley co.

⁴Zha ne rzac por gun zho grë mine rnabey xley zha Israel, min co laa Dios csilaa zho lo dol, gacnañ zho ganle, lel nozozit zho lo Jesús ga; ygaad zho guielnzaac ne ygaa zha ne gnalo Jesús. ⁵Sangue tel no, ndionpaa no silaa Dios no lo dol, sacne dib zdoo no rliladz no Jesús ni nacie Espíritu Sant no. ⁶Sac zha ne nli nole xnëz Jesús, peet liaadz nodraa zho bey ne rio zha Israel. Mine noxcoraa zho nac ne dib zdoo zho gliladz zho Jesús, ni scagaa grieelo gleynie zho samiech zho.

⁷¡Ese tow nli! ¿Pex goc to waa? Zaacse name rac to zeene psilo to bliladz to mine nac diidzli. ¿Cho pquiil to ne nëdraa to tsienal tow? ⁸Mine squi nonie guic to i niina, led zhiwseete Dios i, men ne bredz to griece to ladznia ley. ⁹Golguien sca, adel ye to sac zig rëb diidz ne rnee: “Niipaxe ncobi waa runcsibe ncob quietxil.” ¹⁰Per nanpaa naa, ible men ndzon ne rnabey ne men co gacnie to, zeena csaande to mine nac diidzli; ni zha ne squi racladz gungüet to, tel chotaa nac zho ib tedsod siaabzi Dios zho.

¹¹Bets, sangue naa tel niaca mine nli ye naa quianabey tso grë zha ne rliladz Jesús xbey zha Israel zig quianee zha qui, bod goonzhe ni ctsidildraa zha Israel naa dzigo, glëëdraa zho zig rlëëtaa zho niina zeene ron zho rne naa zha nacne baaadguet Jesús lo cruz. ¹²Zha ne squi ziaadnabey tsopaa to bey ne rio zha bgui nëz Israel, jtebaa mazd ladaque zho yga zho, niicxe gdib nacse zho waa cueniaal zho, led tsod zho noyunneed zho to!

¹³Bets, golguien ganle ne ygadoodraaxe to lo ley waa, min co nacne baaadsilaa Jesús to. Per guiabde to togo ne laa me psilaale to, laa to gun ncuaañe guiaabtaa guic to. Gunscade to, sinque tib tib to golleynie samiech to, ine golgun ncuaañe rquiin grë zha ne nacgrë to; ¹⁴sac niina totsaque gban to zigne rnabey Dios nu: “Bleynie samiech luu zigne rleyneque luu luu”; lëële grë mine nac ley ga gun to. ¹⁵Per tel laa ne gleynie to zha ne nacgrë to, lel dil no to, zig run grë ma ne lëëque ma noquiaalaylsa, lëëque ma noyowlsa; dzigo lëëque to gnitlo to ga. ¡Gunscade to!

Zha ne lega mbanse

¹⁶Gacxe, laa naa rnab lo to: Goltsoxco golban zigne racladz Espíritu Sant, ni me gacniē to; led tsođe to diē zha guñ to grē ncuaañe ndzinlid ne racladz xcuerp to. ¹⁷Sac gon grēse ncuaañ co, rleyñied Espíritu Santa. Laa xcuerp ne ruñ ncuaañe racladz Espíritu Sant, ni ncuaañe racladzгаа Espíritu Sant nēd xcuerp ne gac miñ co. Gunde to miñe racladz xcuerp to sca. ¹⁸Teñe gban to zigne rnabey Espíritu Sant, dzigosi nodraa pe nacne ygadoo to lo xley zha Israel.

¹⁹Ni miech ne sca ruñ grē ncuaañe ndzinlid, ib paat nguēetsd zho:

rionie zho zha ne led tsieeld zho,
ruñ zho grē ncuaañe ndzinlid ne racladztaa xcuerp zho,

²⁰riegañ zho grē mdio,
rnab zho pe sac samiech zho,
rlēēnie zho samiech zho,
rdiñnie zho samiech zho,
rzac zho adel cho glale tsieel zho,
rnadse pew laa zho rlēēle,
runctiñ zho miech,
rguib zho rtso miech,
rbeextso zho diē cho zha ne gacnie zho,

²¹nē rac zdoo zho ran zho ncuaañe quianie stib miech,
rzudz zho,

rcaalsa zho zaatne loxaque rowcho zho, ni ruñ zho grē guilyozh.

Grē ncuaañ co ruñ zho ni grēragaa ncuaañe ndzinlid ne sca nac. Laa naa rbire rso diidz lo to, gunde to grē ncuaañ co; sac gon grēse miech ngoopdol ne sca rban, grielod gdziñ zho zaatne rnabey Dios.

²²Sanguē zha ne zianal miñe racladz Espíritu Sant, znu nac zha co:

rleyñie zho samiech zho,
tibaque nguieel rac zho,
peet dzeb nonied guic zho,
rxecw zho, rievedniobd zho,
niowse rnee zho lo samiech zho,
niapse ncuaañ wen ruñ zho lo samiech zho,
ruñ zho miñe rnee zho guñ zho,

²³miech ndooladz nac zho,
zha rnabey xcuerp zho.

Ni teñe gban ne zigne nac grēse miñ rii, ni tib ley noguiitsd ne ga. ²⁴Grēse miech ne nli xnēzle Jesús no, zieniedraa guic zho guñ zho grē ncuaañe ndzinlid ne bzoobladz zho padzeela, grē ncuaañe ndzinlid ne racladznē xcuerp zho, sac riēñ zho paat rquiind ncuaañ co lo zho. ²⁵Gacxe nagon waa, teñe nli mbannie ne guielmban ne rneedz Espíritu Sant, golgotsaa dzion ne miñe rnabey me. ²⁶Dzigosi gacniatsdraa ne lo samiech ne, tsienaldraa ne diē cho glaaraa guiañ, tso ne nē gac zdoo ne gañ ne grē ncuaañe rap zho, ncuaañe racгаа zho.

None gacnie ne samiech ne

6 Bets, bzian, telne gan to laa cho tib zha ne nacgrë to noyuj pe tib dol, dzigo to ne nac to zha ne nlipaa zienal mine rnabey Espiritu Sant, to golnee lo zho. Diidz wen, diidz ndooladz golco zdoo zho gbiire xixcuaa guic zho; ni scagaa tib tib to none nsin so to, sac gon adel nenda yeque to sca sac. ²Zeene ran to zha ne mban noded, golgun xyudar zho, golchoobladz zdoo zho, sac gon sca rnabey Jesús gban miech.

³Tel zha ne rzac zha non nac zho, ni laa zho peet nond zho; lëëque zha noguitnie zho ga. ⁴Tib tib to, wen wen golguien dien pe quiayun to, telne ncuane ndzinliw ine golley, per tsoode to glëë zdoo to gan to mine run stib zho. ⁵Sac tib tib ne, psose Dios ne pe nac xtsiin me mine gun ne.

⁶Grë zha ne noseed Xtiidz Dios, ib none ncuane rgaataa lo zho gdeed zhow yquii zha ne noluw lo zho.

⁷Tsienie wguite guic to sca, sac gon led yed Dios guiab ne quitnie ne. Tib tib ne, tel pe nac mine run ne mincoque ctsire me lo ne. ⁸Zha ne run grë ncuane ndzinlid, lëë mine cueequia zho ga laa zho nitlo. Laa zha ne gun grë mine rnabey Espiritu Sant, lëë mine ygaa zho ga nac tib guielmban ndzon ne gdzind dze lozh. ⁹Gacxe nagon waa, tibaque gotsaa dzioxcò ne dziuun ne ncuane ndzinli, ncuane rquii, guieete ne; sac telne sca tibaque dzioxcò new, zeene gal dze co laa ne ygaa mine guiogual ne. ¹⁰Zeene gdeedtaaw diidz sca, golgotsaa dzioxcò ne dziuun ne xyudar grëse samiech ne, ni nana zeene zha ne noque xnëz Dios nac zho, mazdraa riegual dziuun ne xyudar zho.

Rso Pabl diidz

¹¹¡Golwi ganle, naazhal pquia nu! ¡Golwi ganle mbee mbee nac letr rii pquia naa rso naa diidz lo to! ¹²Grë zha ne gon squi racladz tsopaa to bey ne rio zha Israel, laa zho runa zeena glëënie miech zho, zigne rlëënie zho grë zha ne rseed miech ne ib laa Jesús gut lo cruz, psilaa me grëse miech lo dol.

¹³Nana, niicxe grë zha ne nole bey co, rundaque zho grë mine rnabey ley; sinque laa zha qui nagon quiaguib tebaa gdeed to diidz tso to bey, zeena sca lozhd guiats zho ne zha bnabey to bio to bey. ¹⁴Sangue tel naa, ib quiaguibd naa ne dien zha gacniats naa, sinque laa naa quiaguib gacnan miech ganle zha nac ne laa Jesús gut lo cruz. Sac tel naa, por grë mine bded Jesús ga, grëta ncuane no lo guidzliu laaw psan naa tib lad; ni niicle naagaa, sca rzac grë miech guidzliu naa. ¹⁵Grëse zha ne ygab xnëz Jesús, nacda ne dien cho no bey ne rio zha Israel, chogaa noda; sinque mine non nacne ctsëë Dios lo xquielmban zho.

¹⁶Grëse to ne nac to zha ne zienal diidz ne rso naa nu, Dios yquia zdoo to, ni me gacnie to ctsebd grë zhgab to; niicle tow ni niicle grëragaa zha ne ngable lo mew.

¹⁷Bets, bzian, golgacnañ sca ganle, ib racladzdraa naa gon pe yquiaaqui gbiire gaquiet miñe bnele naa lo to nu; sac tel naa, grêtaa mdel ne no xcuerp naa nu, lëëlew nac bey ne rlu ganle ne nli lo Jesús ngab naa, ni xtsiin me noyū naa.

¹⁸Jesús men ndzon ne rnabey ne, me tsoxco grê zhizhgab to. Sca gaca. *Pabl*